

四庫全書

史部

欽定四庫全書

史部

輿地廣記卷六至九

詳校官編修_臣曹城

檢討_臣德生覆勘

總校官降調編修_臣倉聖脉

校對官中書_臣宋枋遠

謄錄監生_臣王宮

欽定四庫全書

輿地廣記卷六

宋 歐陽忞 撰

京東東路

望青州少昊之世有爽鳩氏虞夏時有季荊湯末有逢
公伯陵殷末有蒲姑氏暨為諸侯國於此周成王時蒲
姑氏與四國作亂成王滅之以封太公是為齊國所謂
營丘後徙都臨淄亦其地其後為田氏地有秦滅之置

齊郡漢高帝封子肥為齊王故為齊郡亦屬北海千乘
後屬齊國北海樂安兼置青州晉屬齊國濟南樂安永
嘉之亂陷於石勒刺史曹嶷為晉守造廣固城終為季
龍所陷季龍未段龕自號齊王據之慕容恪滅趙克青
州苻氏平燕盡有其地及苻氏敗苻朗以州降晉置幽
州以辟閭渾為刺史鎮廣固隆安四年為慕容恪所陷
遂都之為南燕劉裕滅南燕以羊穆之為青州刺史築
東陽城而居之宋及後魏皆置青州後周為齊郡樂安

北海隋並廢之大業初復置北海郡唐武德四年曰青州天寶元年曰北海郡升平盧軍節度皇朝淳化五年改鎮海軍政和元年曰齊郡今縣六

望益都縣本二漢廣縣地屬齊郡晉廢之廣固縣在縣西四里晉書曹嶷所築有大澗甚廣因曰廣固城為青州刺史治焉段龢慕容德皆據山東陽城北即郡治東城是也晉時城宋將竺夔守之後魏攻圍不下益都本漢侯國武帝封菑川王子胡為益都侯故城在今壽光

縣南元魏置益都縣北齊移入青州城北門外為治所
後置齊郡隋開皇初廢大業初置北海郡唐為青州有
五龍口劉裕圍慕容超于廣固塞五龍口城中男女悉
皆脚弱病者大半遂拔之

望壽光縣本漢博昌壽光縣地後漢晉並屬樂安國隋徙
壽光治所於博昌屬北齊郡唐屬青州有淄澠二水有
灌亭禹後斟灌氏之國有紀國故城春秋紀侯國也漢
曰劇屬北海郡文帝十八年置留川國後漢併入北海

郡故城在縣西南

緊臨朐縣二漢臨朐昌國縣並屬齊郡晉省臨朐入昌國隋開皇六年故昌國為逢山大業初改曰臨朐屬北海郡唐屬青州有伯氏駢邑

上博興縣本漢樂安縣屬千乘郡後漢屬樂安國晉省之其後復置隋改為博昌屬北海郡唐屬青州後唐避諱改為博興

上千乘縣漢舊縣後漢屬樂安國晉省之後復置為樂

安郡治隋開皇初郡廢以千乘屬北海郡唐屬青州有
薄姑城商末為諸侯居此周時與四國作亂成王滅之
有遯臺齊景公飲酒於臺上曰古而無死其樂若何晏
子對曰昔爽鳩氏始居此地季荊因之有逢伯陵因之
蒲姑氏因之而後太公因之古若無死爽鳩氏之樂非
君所願也顏師古言武王初封太公於齊未得爽鳩氏
地成王以益之在漢博昌縣地

上臨淄縣城臨淄水故曰臨淄即營丘也周封太公於

此南郊山下有天齊淵齊所以為齊以天齊也戰國時齊威王項羽封田都漢齊悼惠王皆都之後置齊郡復漢晉為齊國元魏為齊郡北齊廢之隋開皇十六年復置屬北海郡唐屬青州漢西安縣故城在西北本曰渠丘齊大夫雍廩之邑有葵丘牛山時水

上密州戰國時屬齊秦置琅邪郡漢屬琅邪郡及高密城陽二國後漢屬琅邪郡北海國晉屬城陽郡元魏屬高密後置膠州隋開皇初郡廢五年改膠州為密州大

業初州廢復為高密郡唐武德五年曰密州天寶九年曰高密郡皇朝開寶五年升安化軍節度今縣五

望諸城縣本漢東武諸二縣地東武為琅邪郡治所後漢屬琅邪國晉屬城陽郡後魏置高密郡隋開皇初改為密州十八年改東武為諸城大業初復為高密郡唐為密州諸本魯邑春秋城諸及郛是也漢屬琅邪郡後漢屬琅邪國晉屬城陽郡元魏屬東莞郡其後省入東武至隋改焉漢琅邪縣在東境初越王勾踐欲霸中國

徙都於此起觀臺于山上周七里以望東海秦始皇置琅邪郡後東遊過齊登山大樂之因留三月乃徙黔首三萬戶於山下刊石立碑記秦功德漢武帝亦登焉晉省琅邪縣後復置元魏屬平昌郡後又省隋開皇十六年置縣曰豐泉大業初復改為琅邪唐省之

望安丘縣今莒之渠丘也漢為安丘屬北海郡後漢屬北海國晉屬東莞郡元魏屬平昌郡其後並廢隋開皇十六年置牟山縣大業初改名安丘屬高密郡唐乾元

二年以安祿山亂改為輔唐皇朝開寶四年復為安丘
漢梧城朱虛昌安三縣故地在此

望莒縣東莒國戰國時燕將樂毅破齊獨莒不下漢文
帝置城陽國以封朱虛侯劉章光武併入琅邪國魏晉
復置城陽郡後魏置東莞郡北齊郡廢屬義唐郡唐初
廢之以莒屬琅邪後屬密州漢海曲縣故城在縣東呂
母起於此

上高密縣縣有密水故以為名漢文帝置膠西國宣帝

本始元年更名高密國後漢屬北海郡魏晉屬陽城郡
隋屬高密郡唐屬密州漢夷安縣屬高密國本春秋萊
國之夷雒邑晏平仲其邑人也後漢屬北海郡晉以來
省之唐武德六年移高密治故夷安城淳于本春秋州
國漢為縣屬北海郡後漢屬北海國晉屬城陽郡元魏
屬平昌郡北齊省入高密

膠西縣春秋介葛盧國二漢為黔陬縣屬琅邪郡晉屬
城陽郡元魏屬高密郡後置平昌郡隋開皇初郡廢十

六年置縣曰膠西大業初省黔陬入焉屬高密郡唐武德元年省膠西入高密後以其地為板橋鎮皇朝元祐三年復置膠西縣

上齊州春秋戰國皆屬齊郡二漢屬濟南平原東郡晉濟南郡領平壽下密膠東即墨祝阿五縣而以平壽為郡治方今考其屬邑乃漢北海平原膠東地非濟南地也或云魏平蜀將徙其豪將家於濟河北改為濟岷郡而太康地理志無此郡名豈永嘉喪亂簡編散落故失

其傳乎宋為濟南郡復置冀州後魏改為濟州隋開皇
初郡廢大業初州廢置齊郡唐武德元年曰齊州天寶
元年曰臨淄郡五年曰濟南郡皇朝治平三年升興德
軍今縣三

緊歷城縣二漢屬濟南郡宋元魏為郡治焉隋置齊郡
唐為濟州有歷山漢韓信度平原襲破齊歷下軍即此
有華不注山左傳晉卻克敗齊師逐之三周華不注是
也漢末平陵縣本譚國二漢為濟南郡治其後郡徙歷

城而平陵又廢唐武德二年置譚州并平陵縣貞觀六年州廢屬齊州十七年齊王祐起兵平陵人李君求據縣不從因改名全節元和十五年省入歷城漢臺縣故城在縣西

緊禹城縣本祝柯齊邑也春秋襄十九年諸侯盟於祝柯即此二漢曰祝柯屬平原郡晉屬濟南郡隋屬齊郡唐屬齊州天寶元年更名禹城東有野井亭齊侯唁魯昭公之所

中章丘縣本漢陽丘縣屬濟南郡後漢省之復置高唐縣隋開皇十六年改為章丘屬高密郡唐屬齊州有東陵山盜跖死處臨濟鎮本漢朝陽縣隋開皇十六年改曰臨濟別置朝陽大業初省入焉唐屬齊州皇朝咸平四年省入章丘管縣二漢屬濟南郡晉以後廢之地入臨濟

中長清縣本齊之石窰邑二漢及晉為盧縣地隋開皇十四年置長清縣屬濟北郡唐屬齊州武德元年置山

往縣二漢往縣也屬泰山郡天寶元年改為豐齊元和十五年省入長清

中臨邑縣二漢屬東郡晉及元魏屬濟北國隋屬齊郡唐屬齊州有石門有盧縣故城春秋齊侯鄭伯盟於石門尋盧之盟是也有朝陽城漢朝陽縣也屬濟南郡後漢為東朝陽屬濟南國晉屬樂安國其後廢入臨邑

上沂州春秋時齊魯三國之地戰國時屬齊楚秦屬琅邪郡漢屬琅邪東海二郡後置琅邪國魏晉因之宋為

琅邪郡後魏置北徐州後周改為沂州隋開皇初郡廢
大業初州廢復為琅邪郡唐武德四年曰沂州天寶元
年曰琅邪郡今縣五

望臨沂縣本魯地春秋城中二在縣東北二漢屬東海
郡晉屬琅邪國隋為琅邪郡唐為沂州漢即丘縣故城
在縣東南本祝丘春秋夫人姜氏享齊侯於祝丘是也

二漢晉皆屬琅邪國隋大業初省入臨沂漢開陽縣屬
東海郡本郛國也後更名啟陽春秋叔孫州仇帥師城

啟陽是也漢避景帝諱改為開陽後漢晉為琅邪國治其後廢入臨沂故城在縣南漢襄贛縣屬東海郡後漢及晉皆因之其後廢入臨沂故城在縣南

望承縣本漢承縣屬東海郡後漢晉因之隋大業初改承為蘭陵屬彭城郡唐武德四年復更為承以縣置鄒州貞觀元年州廢來屬蘭陵鎮戰國時屬楚春申君以荀卿為蘭陵令二漢晉屬東海郡元康元年置蘭陵郡其後郡縣俱廢唐武德四年置蘭陵縣貞觀元年省入

鄆故鄆國漢屬東海郡後漢晉皆屬琅邪隋大業初省
入承

望沂水縣漢東莞東安二縣地東莞本莒之鄆邑魯取
之漢屬琅邪國晉太康中置東莞郡隋屬高密郡後省
入東安東漢屬城陽國後漢及晉屬琅邪國其後改
沂水縣及南青州東安郡後周改州為莒州隋開皇初
郡廢改縣曰東安十六年又改曰沂水大業初州廢屬
琅邪郡唐屬沂州有沂山禹貢沂水所出有浮來山春

秋公及莒人盟於浮來是也有穆陵山昔召康公賜齊
太公履南至於穆陵即此漢陽都縣春秋賜國也漢屬
城陽國後漢晉屬琅邪國其後廢焉故城在縣南有大
峴山為齊南境其地險固晉將劉裕伐南燕大將公孫
五樓請慕容超據守大峴超不從故敗

望費縣魯季氏邑公山弗擾以費畔即此漢屬東海郡
後漢屬泰山郡晉屬琅邪國隋屬琅邪郡唐屬沂州有
蒙山禹貢所謂蒙羽其藝是也顧史城在縣西北魯附

庸國為東蒙主冉有以為固而近於費勸季氏伐之隋
開皇十八年改南武陽曰顓臾屬琅邪郡唐貞觀元年
省入費漢南武陽縣屬泰山郡後漢及晉因之有顓臾
城隋因改焉故城在縣西漢南城縣屬東海郡後漢屬
泰山晉屬南武城即古之武城子游為宰有絃歌之聲
處也故城在費縣

中新泰縣本漢東上陽縣屬泰山郡後漢省之晉復置
惠帝元康元年改為新泰屬泰山郡隋屬琅邪郡唐屬

沂州漢蒙陰縣屬泰山郡後漢省之晉復屬琅邪國北齊省入新泰故城在縣東南堂阜在東齊地也有夷吾亭管仲以囚自魯歸鮑叔解其縛於此

上登州春秋牟子國戰國屬齊秦屬齊郡二漢晉屬東萊郡元魏屬東牟郡隋屬東萊郡唐置登州天寶元年曰東牟郡今縣四

望蓬萊縣本漢黃縣屬東萊郡後漢為郡治所晉屬東萊國元魏置東牟郡北齊廢東牟入長廣郡隋開皇初

廢長廣屬東萊郡唐如意元年置登州初治牟平神龍三年更名黃為蓬萊徙治焉

望黃縣漢舊縣唐神龍三年更名蓬萊先天元年析蓬萊置黃縣屬登州有萊山漢懷縣地在此有蹲狗山

緊牟平縣二漢舊縣屬東萊郡晉省之後復置隋屬東萊郡唐屬登州漢東牟脰縣地在此有東牟山之采山秦始皇漢武帝嘗登之

中文登縣漢不夜脰縣地屬東萊郡後漢以來省之北

齊置文登縣後周因之隋屬東萊郡唐武德四年置登州貞觀元年州廢如意元年屬登州有文登山有成山漢武帝禮日於成山即此有不夜城古有日夜出見於東萊故萊子立此城以不夜為名有秦始皇石橋

中萊州禹貢所謂萊夷作牧之地春秋為萊國齊侯滅之還萊子於郕戰國屬齊秦屬齊郡二漢為東萊郡晉為東萊國宋為東萊郡後魏兼置光州北齊後周因之隋開皇初郡廢五年改州曰萊州大業初州廢置東萊

郡唐武德四年曰萊州天寶元年曰東萊郡今縣四

望掖縣漢高帝置東萊郡後漢郡徙治黃晉復為郡治
焉後魏以來因之隋開皇初郡廢大業初復置唐為萊
州有掖水因以名縣有三山有萬里沙見史記封禪書
漢曲成當利二縣在此

望萊陽縣二漢昌陽縣屬東萊郡晉省之其後復置隋
屬東萊郡唐屬萊州後唐避廟諱改為萊陽有奚養津
周禮幽州其數奚養

望膠水縣本漢長廣縣地屬琅邪郡後漢屬東萊郡晉咸寧三年屬長廣郡其後郡廢復屬東萊郡隋仁壽元年改曰膠水唐屬萊州

中即墨縣燕將樂毅破齊唯田單守即墨不下卒破燕軍項羽立田單為膠東王都此後屬齊漢文帝十六年復為膠東國後漢國廢屬北海國晉屬北海郡北齊省之隋開皇十六年復置屬東萊郡唐屬萊州漢不具縣屬琅邪郡後漢屬東萊郡晉置長廣縣其後郡廢北齊

省之隋開皇十六年復置尋省入即墨故城在今縣西
漢壯武縣屬膠東國故夷國也左傳紀人伐夷即此後
漢屬北漢國晉屬城陽郡其後廢焉故城在即墨西有
沽水左氏曰沽尤以東即此

上雒州春秋戰國皆屬齊秦屬齊郡二漢為北海郡晉
為濟南國元魏復置北海郡北齊改郡曰高陽隋開皇
初郡廢十六年分置雄州大業初州廢屬北海郡唐初
置雒州尋廢屬青州皇朝以青州北海縣置軍後升為

湖州政和元年曰北海郡今縣三

望北海縣本漢平壽下密桑犢縣地後漢省桑犢餘屬
北海國晉以平壽置齊南郡下密屬焉元魏復為北海
郡北齊改曰高陽隋開皇三年罷郡置下密縣於廢郡
城大業二年改為北海縣而別置下密唐武德二年以
北海置濰州八年州廢省下密入北海屬青州皇朝建
隆三年置北海軍乾德二年升為濰州有斟亭禹後斟
尋氏之國有寒亭羿相寒浞之國有漑源山漑水所出

古所謂覆甑山也

望昌邑縣二漢都昌縣地屬勃海郡元魏屬北海郡隋因之後省為北海縣地皇朝建隆三年析置昌邑縣有濰水出箕山北至都昌入海漢末北海相孔融為黃巾賊管亥所圍劉先主救之於此

緊昌樂縣二漢營陵縣地屬北海郡晉屬高密國元魏屬平昌郡後改為營丘北齊廢之隋開皇十六年復置屬北海郡唐貞觀八年省入北海皇朝乾德三年以營

丘城置安仁縣尋改為昌樂

上淄州春秋戰國皆屬齊秦屬齊郡漢屬濟南樂安國
後漢因之晉屬樂安國後魏置東清河郡北齊郡廢隋
置淄州大業初州廢併入齊郡唐武德元年置淄州天
寶元年曰淄川郡今縣四

望淄川縣本漢般陽縣地屬齊南郡後漢屬齊國晉省之
後魏置貝丘縣及東清河郡北齊郡廢隋開皇十六年
置淄州十八年改貝丘為淄川屬齊郡唐屬淄州有淄

水出泰山萊蕪縣蔡山東北過臨淄縣東又東北過利縣東又東北入於海漢萊蕪故城在東南菑川國亦在此古齊長城

中長山縣本二漢於陵縣地屬濟南郡晉省之後置武彊縣隋開皇十八年改曰長山屬齊郡唐屬淄州有長白山陳仲子夫妻隱處

中下鄒平縣古鄒國二漢屬濟南郡晉曰鄒屬樂安國後改為平原縣隋開皇十八年復曰鄒平屬齊郡唐屬

淄州

下高苑縣漢屬千乘郡後漢晉屬樂安國北齊改曰長樂隋開皇十八年改曰會城大業初復名高苑屬齊郡唐屬淄州漢被陽縣在此漢狄縣田儋兄弟殺狄令起兵於此漢屬千乘安帝永初二年改為臨濟屬樂安國其後省入高苑

同下州淮陽軍春秋戰國屬宋魯秦屬薛郡漢屬東海郡後漢為下邳國晉宋因之梁為武州及下邳郡後魏

為東徐州後周為邳州隋開皇初郡廢大業初州廢復屬下邳郡唐置邳州後州廢屬泗州又屬徐州皇朝置淮陽軍今縣二

望下邳縣夏時奚仲自薛徙此秦末為東陽郡治秦嘉其邑人也韓信為楚王都此國徐屬東海郡後漢永平十五年置下邳國晉宋因之城有三重大城南門謂之白門曹公擒陳宮處也中城呂布所守也小城晉荀羨却曇所治也梁置武州下邳郡後魏置東徐州後周置

邳州隋皆廢之後復置下邳郡於宿豫而以下邳縣屬
焉唐武德四年置邳州貞觀元年州廢屬泗州而省邳
良城淮陽三縣入下邳元和四年屬徐州皇朝太平興
國七年置淮陽軍縣處沂泗之會城東南有小沂水水
上有橋楚人謂橋曰圯張良遇黃石公於下邳圯上即
此葛嶧山在西禹貢所謂嶧陽也邳陽故已姓國春秋
邳子來朝是也秦置邳郡二漢晉皆為東海郡治兼為
徐州刺史治焉後魏復置邳郡隋開皇初郡廢屬下邳

郡唐省之故城在縣北良城縣左傳昭十三年晉侯會
吳子於良是也漢屬東海後漢晉皆屬下邳梁置武原
郡隋開皇初郡廢屬下邳唐省之淮陽縣在漢凌縣泗
陽之間有淮陽切梁置淮陽郡東魏置綏化縣後周改
為淮陽隋開皇初郡廢屬下邳唐省之漢睢陵縣故城
在此

中宿遷縣秦下相縣地城在西北項羽即此縣人也屬臨
淮軍晉元帝督運軍儲以為邳閭因置宿豫縣及宿豫

郡焉明帝大寧中兗州刺史劉遐自彭城退屯泗口即
此安帝義熙中置城在今縣東南臨泗水南近淮水自
後為重鎮後魏太和中南徐州治此後省州為成隋開
皇初廢宿豫郡以縣屬下邳唐屬泗州寶應元年避諱
改為宿遷屬徐州皇朝太平興國七年來屬

輿地廣記卷六

欽定四庫全書

輿地廣記卷七

宋 歐陽忞 撰

京東西路

襲慶府大都督府兗州春秋戰國為魯邾二國之境秦
置薛郡二漢屬魯國泰山山陽郡晉屬魯郡山陽兼置
兗州宋屬魯郡泰山高平後魏為魯郡北齊改為任城
郡隋開皇三年郡廢大業二年改兗州為魯郡唐武德

初克徐圓朗復曰兗州天寶元年曰魯郡後升泰寧軍
節度周降防禦皇朝建隆元年復泰寧軍大中祥符元
年升都督府今縣七

上瑕丘縣本魯負瑕邑春秋季康子入邾以邾子孟來
囚諸負瑕是也瑕丘在縣西南昔衛公叔文子升之蘧
伯玉從文子曰樂哉斯丘死則我欲葬焉伯玉曰吾子
樂之則瑗請前二漢屬山陽郡晉省入南平屬高陽隋
開皇十三年復置瑕丘為魯郡治唐為兗州漢楚屬國

後漢屬任城國晉因之其後廢焉故城在今縣西南有檀鄉

上奉符縣本漢博縣屬泰山郡後漢晉因之後魏為郡治北齊改郡曰東平隋開皇初郡廢十六年改縣曰汶陽尋改為博城屬魯郡唐武德五年置東泰州貞觀元年州廢屬兗州乾封元年更名乾封皇朝大中祥符元年改為奉符漢奉高縣為泰山郡治後漢晉因之其後郡徙治博隋開皇六年改縣曰岱山大業初省入博城

漢梁父年二縣並屬泰山郡年故國春秋年人來朝是也隋省之唐省梁父皆入博城有泰山梁父山昔秦始皇禪梁父即此有龜蒙山魯頌所謂奄有龜蒙是也漢鉅平縣屬泰山郡後漢晉因之其後廢地入博城有亭亭山社首山

上泗水縣本魯卞邑春秋夫人姜氏會齊侯於卞是也漢屬魯國後漢晉因之其後廢焉隋開皇十六年於卞故城置泗水縣屬魯郡唐屬兗州有陪尾山泗水所出

有云云山有尼丘山孔子母顏氏所禱即此漢汶陽縣屬魯國後漢晉因之後廢故城在縣西

上龔丘縣本漢寧陽縣屬泰山郡後漢屬東平國晉省之北齊置平原縣隋開皇十六年改曰龔丘屬魯郡唐屬兗州漢剛縣屬泰山郡本魯之闡鄉春秋齊人取闡及闡是也後漢屬濟北國晉曰剛平屬東平國其後廢焉故城在今縣東北漢蛇丘縣屬泰山郡城下有水即魯之蛇淵圃也春秋為鑄遂二國地鑄為蛇丘治所而

遂在西北十里後漢晉屬濟北國後廢按水經注云汶水又西洸出水焉又西逕蛇丘縣南又云蛇水西南逕下謹城南蛇水即謹水也今洸水謹水在龔丘則亦蛇丘地矣

中下仙源縣本壽丘黃帝所生之地亦為少昊氏之墟有大庭氏之庫周封伯禽為魯侯宅曲阜曲阜在城中委曲長七八里楚滅魯以為縣秦置薛郡漢高后元年改為魯國後漢因之晉為魯北齊改為任城郡隋開皇

三年郡廢四年改魯縣為汶陽十六年改曰曲阜屬魯
郡唐屬兗州皇朝大中祥符元年改為仙源有關里孔
子所居漢魯恭王殿階猶存

中下萊蕪縣漢屬泰山郡後漢晉因之後廢後魏于萊
蕪故城置羸縣隋屬魯郡唐貞觀元年省入博城長安
四年復置萊蕪屬兗州羸本齊邑春秋公會齊侯於羸
是也漢屬泰山郡後漢晉因之後廢地入萊蕪有源山
淄水文水所出淄水東北流至于乘入海汶水西南流

至中都入大野陂有肅然山漢武帝禪肅然即此

下鄒縣春秋時邾文公卜遷於繹即此後改為鄒戰國時為楚所滅城北有孟子塚二漢屬魯國晉隋屬魯郡唐屬兗州嶧山在北秦始皇上嶧山命李斯勒石頌秦德焉有鳧山魯頌所謂保有鳧繹是也南平陽縣二漢屬山陽郡晉屬高平國後廢入鄒

大都督府徐州春秋屬宋戰國時屬楚秦屬泗水郡項羽為西楚霸王都二漢屬楚國沛郡後漢晉皆屬彭城

沛國兼置徐州宋因之後魏亦屬彭城沛郡置徐州後
周廢沛郡隋開皇初廢彭城郡大業初復為彭城郡唐
為徐州號建寧軍今縣三

望彭城縣故大彭國彭翦所封春秋時宋封魚石為采
邑周顯王四十二年九鼎淪於泗水秦始皇過彭城使
千人求之不得項羽都之號西楚漢高帝封弟友為楚
元王後漢光武封其子英為楚王晉為彭城國兼置徐
州治此為重鎮劉裕為宋公嘗居之後宋將薛安都舉

城歸魏以為彭城郡兼置徐州隋開皇初郡廢大業初復置唐為徐州

望沛縣有沛澤因以為名秦屬泗水郡二漢屬沛郡高帝縣人起兵於此號沛公後破黥布還置酒沛宮蜀先主屯小沛袁術遣紀靈攻劉呂布來救之即此晉屬沛國隋屬彭城郡唐屬徐州漢廣戚縣屬沛郡後漢晉屬彭城後廢入沛

望蕭縣故國春秋時楚子滅之漢屬沛郡後漢晉屬沛

國北齊改為承高隋開皇六年改為龍城十八年改為
臨沛大業初復改曰蕭屬彭城郡唐屬徐州漢扶陽縣
屬沛郡後漢省之故城在縣西北

緊滕縣故國漢地理志云周懿王子錯叔繡所封而左
傳云邾雍曹滕文之昭也恐地理志誤戰國時為齊所
滅漢封夏侯嬰為滕文後為公丘縣屬沛郡後漢屬沛
國晉屬魯郡後廢公丘入蕃縣蕃縣二漢屬魯國晉屬
魯郡後置蕃郡北齊郡廢隋改蕃縣曰滕屬彭城郡唐

屬徐州薛縣故國奚仲所封戰國時屬齊謂之徐州秦屬薛郡二漢屬魯國晉屬魯郡後廢故城在今縣東昌慮縣故小邾國漢屬東侯郡後漢晉因之後廢故城在今縣東南

緊豐縣秦泗水郡沛縣之豐邑漢高帝生於此後以為縣屬沛郡後漢晉屬沛國隋屬彭城郡唐屬徐州大澤在西高帝斬白蛇於此

東輔拱州春秋屬宋陳戰國屬楚魏秦屬三川碭郡漢

屬陳留淮陽梁國後漢屬陳留濟陰陳梁國晉屬陳留
濟陽梁國隋屬梁郡淮陽唐屬宋城曹州梁屬開封宋
州後唐復屬宋陳曹州晉漢周皆屬開封宋州皇朝屬
開封應天府崇寧四年建名輔州以為東輔又改為拱
州治襄邑縣今縣六

畿襄邑縣本宋承匡襄陵鄉也襄公所葬故曰襄陵秦
始皇以承匡卑濕乃徙縣於襄陵謂之襄邑漢晉屬陳
留郡北齊廢之隋開皇十六年復置屬梁郡唐屬宋州

梁開平元年屬開封府後唐同光初還舊晉天福中又屬開封皇朝崇寧四年立拱州

畿考城縣本子姓戴國春秋宋人蔡人伐戴是也秦謂之穀縣楚漢兵起邑多遇火因名留縣漢屬梁國後漢屬陳留郡章帝東巡詔改曰考城取越乃光烈考武王之義也後魏曰考陽置北梁郡北齊並廢之以為城安縣隋開皇十八年復改曰考城屬梁郡唐屬曹州梁開平元年屬開封府皇朝崇寧四年來屬漢薄縣屬山陽

郡故城在東北湯都亭即此水經注言梁有二亭南亭
在穀熟北亭在蒙皆為湯所都學者多謂亭在河洛之
間以今偃師城二十里尸鄉為是皇甫謐以為孟子言
湯居亳與葛為鄰今寧陵古葛國地湯地七十里葛又
伯耳封域有限而寧陵去偃師八百里安能使亳衆往
為之耕而童子饋食哉乃知梁之二亭為湯都審矣
畿太康縣本陽夏縣漢屬淮陽國後漢屬陳晉屬梁國
後置淮陽郡隋開皇初郡廢七年改陽夏曰太康屬淮

陽郡唐屬陳州梁開平元年屬開封府皇朝崇寧四年
來屬有後漢扶樂縣故城在北

畿寧陵縣古葛伯國書所謂湯征自葛是也戰國屬魏
為信陵君無忌所封漢屬陳留郡晉屬梁國北齊廢之
隋開皇十六年復置屬梁郡唐屬宋州皇朝屬應天府
崇寧四年來屬

畿楚丘縣春秋戎州已氏之邑蓋昆吾之後別在夷狄
者周襄入居於此漢為已氏縣屬梁國後漢屬濟陰郡

晉屬濟陽郡後魏置北譙郡北齊並廢之隋開皇四年
復置己氏縣六年改曰楚丘屬梁郡唐屬汴州皇朝屬
應天府崇寧四年來屬水經云昔衛文公徙居卽此非
也衛為狄所滅東徙渡河野處曹邑文公徙居楚丘曹
邑在今滑之白馬楚丘在今澶之衛南二邑相近且不
出邦域之內宜文公之所徙也今拱州楚丘在我州之
邑迫近宋都春秋所謂戎伐凡伯于楚丘是也非衛之
所遷也然則今縣有景山京岡乃後人附會而名之耳

畿柘城縣二漢為柘縣屬淮陽國其後廢焉隋開皇十
六年置柘城縣屬梁郡唐屬宋州皇朝屬應天府崇寧
四年來屬都督興仁府周武王封弟叔振鐸為曹國其
後為宋所滅戰國屬魏秦屬碭郡漢立彭越為梁王都
之景帝中六年別為濟陰國甘露二年更名定陶又改
為濟陰郡後漢因之晉為濟陽郡後魏置沛郡及西充
州北齊郡廢後周改西充為曹州隋復為濟陰郡唐復
為曹州晉號為威信軍節度漢罷之周改彰信軍皇朝

建中靖國元年改為興仁軍後升興仁府大觀三年升
都督今縣四

望濟陰縣本漢定陶縣地汜水西分濟瀆東北逕縣南
又東北入於河瀆高帝既定天下即位于汜水之陽取
其汜愛洪大而潤下也二漢置濟陰郡晉為濟陽郡後
魏分定陶置濟陰縣及沛郡北齊郡廢屬濟陰郡隋開
皇六年分濟陰置黃縣十八年改為蒙澤大業初省入
焉唐為曹州貞觀元年省定陶入焉

望寃亭縣本曰寃句二漢屬濟陰郡晉屬濟陽郡隋屬
濟陰郡唐屬曹州皇朝大觀二年改為寃亭有故煮棗
城史記蘇秦說魏襄王曰大王之地東有淮潁煮棗是
也有漆園莊周為蒙漆園吏則寃句亦蒙縣地矣

緊乘氏縣春秋魯莊公敗宋師於乘丘即此二漢屬濟
陰郡晉屬濟陽郡隋屬濟陰郡唐屬曹州二漢句陽縣
屬濟陰郡左傳桓十二年公及宋公盟於句瀆之丘是
也晉屬濟陽郡其後廢焉故城在今縣西

上南華縣本漢離狐縣屬東郡後漢屬濟陰晉屬濟陽
後魏置北濟陰郡北齊郡縣並廢唐復置離狐縣屬曹
州天寶元年更名南華有濮水莊子釣於濮水是也

東平大都督府鄆州春秋為須句國及屬魯戰國屬宋
秦屬碭郡漢屬東郡東平國後漢因之晉為東平國及
屬濟北隋為鄆州及屬濟州後為東平郡及屬濟北唐
為鄆州及屬濟州後廢濟州入焉皇朝大觀元年升大
都督府今縣六

望須城縣故須勾國風姓太昊之後春秋邾人滅須勾
須勾子奔魯魯伐邾取須勾反其君焉秦置須昌縣須
昌在須勾城北蓋須勾子所遷也漢屬東郡後漢屬東
平晉為東平治所北齊郡廢隋開皇十六年改須昌為
宿城而於宿城西北三十二里別置須昌屬東平郡唐
屬鄆州貞觀八年州自鄆城移治須昌後唐避廟諱改
為須城宿故風姓國太昊之後春秋及宋人盟於宿二
漢為無鹽縣東平國治焉晉屬東平其後廢之隋置宿

城縣屬東平唐屬鄆州貞觀八年省入須昌景雲三年
復置宿城貞元四年改曰東平移於郭下太和四年改
曰天平六年省入須昌有邱鄉亭魯大夫邱伯食邑也
望陽穀縣春秋齊侯宋公江人黃人會于陽穀杜預云
齊地在須昌北隋開皇十六年置陽穀縣屬濟北郡唐
屬濟州天寶十三載州廢來屬有盧縣本齊地漢屬泰
山郡後漢屬濟北國晉因之後魏置濟州隋大業初置
濟北郡唐武德四年復置濟州天寶十三載州廢來屬

其後省焉有礪礪城為濟州治所宋寧朔將軍王玄護
前鋒入河平礪礪守之其城臨水西南圯於河今濟州
徙置鉅野而盧縣廢久唯礪礪津在陽穀境則亦盧地
矣

緊中都縣本古厥國漢為東平陸縣屬東平國後漢及
晉皆因之北齊改曰樂平隋開皇十六年改為平陸縣
屬魯郡隋屬魯州天寶元年更名中郡貞元十四年來
屬中都魯邑孔子之所宰也

緊東阿縣本齊之柯邑春秋莊十三年公會齊侯盟于柯曹沫劫盟于此二漢曰東阿屬東郡晉屬濟北國隋屬濟北郡唐屬濟州天寶十三載州廢來屬有阿井歲常煮膠以貢天府穀城齊地也春秋莊公七年夫人姜氏會齊侯于穀三十二年魯城小穀以為管仲私邑域中有管仲井後漢置穀城縣屬東郡晉屬濟北國其後廢入東阿故城在縣東有穀城山漢張良得穀城山下黃石取而寶祠之即此

上壽張縣本春秋之良邑漢置壽良縣屬東郡後漢光武叔父名良改為壽張屬東平國晉因之隋屬濟北郡唐屬鄆州有蚩尤祠

上平陰縣本齊地春秋襄十八年公會諸侯同伐齊齊侯禦諸平陰漢晉為盧縣地隋開皇十四年置榆山縣屬濟北郡大業初改曰平陰唐屬濟州天寶十三載州廢來屬漢肥城縣故肥子國也屬泰山郡後漢省之其後復焉宋置濟北郡後魏因之北齊郡廢後周置肥城

郡隋開皇初郡廢縣屬濟北郡唐省之故城在平陰東南

上濟州春秋屬魯戰國屬宋秦為碭郡二漢屬山陽郡東平國晉屬高平任城國隋屬東平濟陰魯郡唐屬鄆兗二州舊濟州治盧唐廢入鄆州其地今在陽穀西北周別置濟州於鄆州之鉅野皇朝因之今縣四

望鉅野縣二漢屬山陽郡晉屬高平國其後廢焉隋開皇十六年復置屬東平郡唐屬鄆州周廣順二年置濟

州禹貢大野澤在東北左傳襄十四年西狩于大野獲麟以為不祥仲尼曰麟也然後取之

望任城縣故任國大夫氏之後漢屬東平國後漢置任城國晉因之後置高平郡隋開皇初郡廢縣屬魯郡唐屬兗州周廣順二年來屬漢廢入縣屬東平國後漢屬任城國晉因之其後廢焉故城在今縣南

望金鄉縣漢昌邑縣地縣所治名金鄉山漢司隸校尉魯恭嘗於山北鑿石為冢得白兔白蛇不葬更葬山南

鑿而得金故曰金鄉山後漢置縣屬山陽郡晉屬高平國隋屬濟陰郡唐屬兗州周廣順二年來屬昌邑故屬梁漢景帝十六年別置山陽國武帝天漢四年更名昌邑以封子昌邑哀王其後國除復為山陽郡後漢因之兼為兗州刺史治晉為高平國其後廢入金鄉隋開皇十六年分置昌邑大業初省入焉故城在縣西有東緡縣本宋邑春秋僖二十三年齊侯伐宋圍緡是也二漢屬山陽郡後省入昌邑今併入金鄉

望鄆城縣今魯西邑左傳成十六年晉人執季文子于
莒丘公還待于鄆漢晉皆為廩丘縣地後周置清澤縣
及高平郡隋開皇初郡廢改縣曰高安十八年改曰鄆
城大業初置東平郡唐為鄆州貞觀八年州徙治於須
昌周廣順二年來屬

上軍州春秋屬宋魯戰國屬宋秦置碭郡漢屬山陽梁
國後漢屬濟陰梁國晉屬濟陽梁國隋屬濟陰梁郡唐
屬宋曹兗州唐末以宋州之碭山梁太祖鄉里也為置

輝州已而徙治單父後唐滅梁改為單州其屬縣置徙傳記不同今領單父碭山成武魯臺四縣

望單父縣本魯邑宓子賤為宰彈琴不下堂而治者也漢屬山陽郡後漢屬濟陰郡晉屬濟陽郡後魏曰離狐置北濟陰郡北齊並廢之隋開皇六年更置曰單父屬濟陰郡唐屬宋州後屬輝州光化三年自碭山徙輝州來治後唐改為單州

望碭山縣碭文石也山出文石故以名之秦置碭縣及

碭郡漢高帝隱於芒碭山澤間有雲氣呂后與人俱求
常得之高帝五年置梁國後漢屬焉晉省入下邑後魏
置曰安陽隋開皇十八年改名碭山屬梁郡唐屬宋州
朱全忠此縣人也光化二年表置輝州三年徙治單父
後唐屬單州

繁成武縣漢屬山陽郡後漢屬濟陰郡晉屬濟陽郡北
齊置永昌郡隋開皇初郡廢十六年置戴州大業初州
廢縣屬濟陰郡唐屬曹州光化二年屬輝州後唐屬單

州

上魚臺縣本魯之棠邑春秋隱五年公矢魚于棠二漢
為方與縣屬山陽郡晉屬高平國元魏屬高平郡北齊
廢之隋開皇十六年復置屬彭城郡唐屬兗州寶應元
年更名魚臺以城北有魯侯觀魚臺故也其後來屬漢
胡陵縣屬山陽郡後漢章帝改為胡陸晉屬高平國其
後廢焉故城在今縣東

上濮州春秋戰國時皆屬衛秦屬東郡二漢屬濟陰東

郡晉屬濮陽濟陽東平國隋屬東平濟北郡唐為濮州
今縣四

望鄆城縣本衛地春秋莊十四年單伯會諸侯于鄆二
漢為鄆城縣屬濟陰郡曹公為兗州刺史創業始於此
焉晉屬濮陽國後置濮陽郡隋開皇初郡廢十六年置
濮州大業初州廢縣屬東平郡唐為濮州

緊雷澤縣本成國周武王弟成叔武所封其後遷于成
之陽故為成陽縣二漢屬濟陰郡晉屬濟陽郡北齊廢

之隋開皇十六年復置曰雷澤屬東平郡唐屬濮州禹
貢雷夏澤在西北廩丘本齊邑左傳襄二十四年齊烏
餘以廩丘奔晉漢屬東郡後漢屬濟陰郡晉屬濮陽國
隋大業初省焉故城在縣北

上臨濮縣漢濮陽成陽縣地隋開皇十六年分雷澤置
大業初省入焉唐武德四年復置屬濮州春秋宣十一
年晉人宋人衛人曹人同盟于清丘杜預注云清丘衛
地在濮陽縣東南其地今入臨濮

上范縣二漢屬東郡晉屬東平國北齊廢之隋開皇十六年復置屬濟北郡唐屬濮州春秋晉大夫士會之邑也

同下州廣濟軍自唐虞以下地理與興仁府同皇朝置廣濟軍今縣一

上定陶縣故三股國周封曹叔振鐸於此范蠡變姓名寓居於陶曰陶朱公秦相魏冉以陶邑封焉梁王彭越都之漢宣帝封子為定陶恭王後為濟陰郡晉為濟陽

郡後魏屬西兗州後周屬曹州隋屬濟陰郡唐貞觀元年省定陶入濟陰縣皇朝太平興國三年以定陶鎮置廣濟軍熙寧四年軍廢屬曹州元祐元年復置禹貢陶丘在西南荷澤在東北

輿地廣記卷七

欽定四庫全書

輿地廣記卷八

宋 歐陽忞 撰

京西南路

望襄州春秋已來楚地秦南郡之北界二漢屬南陽南
郡魏置襄陽郡晉因之兼置荊州東晉置雍州宋文帝
割荊州置雍州襄陽去江陵步道五百勢同唇齒無襄
陽則江陵受敵自東晉庾翼為荊州刺史將謀北伐遂

鎮襄陽齊梁皆因之後梁蕭詧都此西魏改曰襄州隋
開皇初郡廢大業初州廢復置襄陽郡唐武德四年曰
襄州天寶元年曰襄陽郡後為山南東道節度今縣六
縣襄陽縣二漢屬南郡劉表為荊州牧鎮曹魏屬襄陽
為重鎮蜀將關侯攻沒于禁曹仁勢甚盛徐晃屯守不
下曹公謂晃曰全襄陽子之功後孫權帥兵向西時曹
仁鎮之司馬懿曰襄陽水陸之衝禦寇要地不宜失也
晉因之兼為荊州刺史治羊祜杜預皆鎮焉東晉僑置

雍州宋齊梁皆因之郡亦自宜城徙治焉後梁蕭譽都此而為西魏附庸後周置襄州隋開皇初郡廢大業初復置唐為襄州有峴山羊祜與鄒湛等嘗登之今墮淚碑在焉有鹿門山龐德公隱居之所有望楚山古馬鞍山也晉劉弘山簡九日晏游於此武陵王愛其峯秀故曰望楚山

望鄧城縣故鄧國二漢為鄧縣屬南陽郡晉曰鄧城屬襄陽郡其後廢入樊城樊周仲山甫所封也東漢建安

中關侯圍于禁於樊後晉樊城縣後周省入安養隋屬襄陽郡唐屬襄州天寶元年改安養曰臨漢王元二十一年移治古鄧城復改曰鄧城有樊城鎮

緊襄城縣故穀國二漢為筑陽縣屬南陽郡晉屬順陽郡其後廢焉孝武置義城縣及義城郡後周郡廢隋開皇十八年改縣曰穀城屬襄郡唐屬襄州

中下宜城縣故馭楚之別都也秦為南郡之北部漢惠帝三年改曰宜城屬南郡建安十三年魏武平荊州分

置襄陽郡晉因之宋曰華山縣置華山郡後魏改為宣
城郡分華山置率道縣西魏改華山縣曰漢南後周郡
廢隋屬襄陽郡唐屬襄州貞觀八年省漢南入率道天
寶七載改率道曰宜城有黎丘城後漢初秦豐阻兵於
黎丘即此郡縣故郡國春秋時自商密邈此為楚附庸
楚滅之昭王畏吳自郢遷焉後復還郢二漢及晉屬南
郡隋屬襄陽郡唐改為樂鄉武德四年置郡州貞觀八
年州廢屬襄州周省入宜城

中下中廬縣故廬戎國二漢為中廬縣屬南郡晉屬襄陽其後廢焉梁置穰縣西魏改為義清屬歸義郡後周廢隋屬襄陽郡唐屬襄州皇朝太平興國元年復改為中廬

中下南漳縣本漢臨沮縣屬南郡晉屬襄陽其後廢焉西魏置重陽縣後周改曰思安隋開皇十八年改曰南漳屬襄陽郡唐屬襄州武德二年析南漳置荆山貞觀八年省南漳入義清開元十八年徙荆山于故南漳禹

貢荆山在東北荆豫二州於是分境楚卞和得玉之處
上鄧州本夏禹之國春秋時申鄧二國地戰國屬韓自
後屬楚秦置南陽郡二漢因之晉屬南陽國及順陽義
陽二國之境宋齊為南陽郡後魏兼置荊州西魏為重
鎮隋開皇初改為鄧州大業初州廢復置南陽郡唐武
德二年曰鄧州天寶元年曰南陽郡梁升為宣化軍節
度後唐改曰威勝周改曰武勝今縣五

上穰縣本楚別邑秦取之以封魏冉為穰侯後屬南陽

郡二漢因之晉屬義陽郡後魏為南陽郡治及荊州刺史治焉隋開皇初改為鄧州後為南陽郡唐復為鄧州二漢朝陽縣屬南陽郡晉屬義陽郡其後廢焉故城在今縣東南二漢新野縣屬南陽郡晉置義陽郡後曰棘陽置新野郡後周郡廢隋開皇初復改縣曰新野屬南陽郡唐乾元元年省入穰漢冠軍縣本穰盧陽郡武帝以封霍去病去病仍出征匈奴功冠諸軍故曰冠軍屬南陽郡後晉隋皆因之唐貞觀元年省入臨潁漢涅陽

縣屬南陽郡後漢及晉皆因之隋開皇初改曰課陽唐貞觀元年省入穰故臨瀨縣本漢冠軍縣之北境魏置新城縣西魏改為臨湍隋開皇初復名新城屬南陽郡唐屬鄧州天寶元年復名臨湍漢改曰臨瀨皇朝建隆初省入穰

中下南陽縣故申國戰國時秦周王以為宛縣置南陽郡漢因之王莽以宛為南陽後漢復為宛晉如之後魏置上陌縣後周併宛入焉更名上宛隋開皇初改為南

陽郡唐屬鄧州博望鎮漢博望縣也武帝置以封張騫
屬漢陽郡後漢及晉皆因之其後廢焉安衆鎮二漢安
衆縣也屬南陽郡晉省之漢杜衍縣屬南陽郡後漢省
之故城在今縣西二漢育陽縣屬南陽郡晉因之其後
廢焉故城在今縣南漢雒縣屬南陽郡東漢及晉皆因
之元魏曰北雒後省即陳倉人所逐二童子名寶雞者
雄止陳倉為石雌止此縣故名之漢西鄂縣屬南陽郡
東漢及晉皆因之元魏省入北雒西魏向城縣屬雒陽

郡隋開皇初郡廢屬消陽郡唐屬鄧州復省入南陽
中下內鄉縣本楚之白羽邑春秋昭十八年許遷于白
羽後改為析漢屬弘農郡後漢屬南海郡晉屬順陽郡
後曰西浙置淅陽郡後周改縣曰中鄉省淅川入焉隋
改中鄉曰內鄉屬淅陽郡唐屬鄧州菊潭鎮本漢酈縣
屬南陽郡後漢及晉皆因之隋開皇初改為菊潭縣北
有菊水其旁悉生甘菊水極甘馨中有三十家不復穿
井仰飲此水上壽至百二三十唐屬鄧州周省之丹水

鎮漢丹水縣也屬弘農郡後漢屬南陽郡晉屬順陽郡
後置丹川郡後周郡廢隋屬淅陽郡其後廢焉東有張
村張儀說楚絕齊許以商於之地六百里即此

中下淅川縣本後漢南鄉縣魏置南鄉郡晉改為順陽
郡後魏復為南鄉郡又分置淅川縣後周省之隋開皇
初郡廢大業初置淅陽郡其後淅陽及南鄉縣皆廢焉
五代時復置淅川縣屬鄧州

中下順陽縣漢屬南陽郡哀帝改為博山晉屬順陽郡

西魏併置鄭縣尋改為清鄉後周省順陽入焉隋開皇
初復改為順陽其後省入內鄉為鎮皇朝太平興國六
年升為縣

上隨州春秋隨國戰國屬楚秦屬南陽郡二漢因之晉
屬義陽郡惠帝置隨郡宋齊因之西魏置并州後改曰
隨州隋開皇初郡廢大業初州廢置漢東郡唐武德三
年曰隨州天寶三年曰漢東郡皇朝乾德三年升崇義軍
節度太平興國元年改崇信軍今縣三

上隨縣故隨國左傳所謂漢東之國隨為大者也其後
楚滅之以為縣二漢屬南陽郡晉屬義陽郡惠帝置隨
郡宋齊因之西魏置隨州隋置漢東郡唐復為隨州光
化鎮本隨縣地南齊分置安化縣西魏改為新化後周
改為光化隋屬漢東郡唐屬隨州皇朝熙寧元年省焉
有斷蛇丘隋侯出而見大蛇中斷舉而藥之後蛇銜明
珠報德故名

中下唐城縣故唐國屬楚漢為上唐鄉屬沔陵縣晉屬

安昌縣後置上唐縣後魏曰厥西置義陽郡西魏改縣曰下澁隋開皇初郡廢十六年改縣曰唐城屬漢東郡其後省入棗陽唐開元二十六年復置屬隨州梁改為漢東後唐復故晉又改為漢東漢又復故

中下棗陽縣本二漢蔡陽縣屬南陽郡晉屬義陽郡後廢焉置廣昌縣及廣昌郡後魏置南荊州西魏改曰昌州隋開皇初郡廢仁壽元年避太子名改廣昌縣曰棗陽大業初州廢置春陵郡唐武德初郡廢五年改昌州

為唐州九年州徙治比陽貞觀十年以棗陽來屬漢春陵縣本蔡陽之白水鄉元朔五年以零陵冷道之春陵鄉封長沙王子買為春陵侯至戴侯仁以春陵地邢下濕上書請徙南陽元帝許之以蔡陽白水鄉徙仁為春陵侯光武其後也故張衡賦云龍飛白水晉改為安昌縣後復曰春陵置安昌郡隋開皇初郡廢屬昌州大業初屬春陵郡後省之故城在今縣東後漢襄鄉縣屬南陽郡後廢為故城在今縣東北

上金州春秋戰國皆屬楚秦及二漢屬漢中郡魏以漢中遺入在東陲者置魏興郡晉宋齊皆因之梁兼置南梁州西魏改曰東梁州以其地出金又改為金州置金城郡隋開皇初郡廢大業三年州廢置西城郡唐武德元年曰金州天寶元年曰安康郡至德二載改曰漢陰郡後復曰安康石晉升懷德軍尋罷皇朝乾德五年升昭化軍今縣五

下西城縣本媯墟舜常居之二漢屬漢中郡建安中置

西城郡劉先主以申儀為太守儀據郡降魏魏文帝改為
魏興郡晉因之後周省入吉安隋大業三年改縣曰金
川復置西城郡義寧二年縣復曰西城唐為金川有伏
義山

下平利縣漢長利縣屬漢中郡東漢省之晉復置屬魏
興郡宋改為錫縣後廢梁初置上廉縣後改曰吉陽西
魏改曰吉安後廢唐武德元年置平利縣大曆六年省
長慶初復置皇朝熙寧六年省元祐二年復置有女媧

山

中洵陽縣北山洵水所出南入沔故以名縣漢屬漢中
郡後漢省之晉復置屬魏興郡後置洵陽郡隋開皇初
郡廢屬西城郡唐屬金州洵陽鎮本西魏洵陽郡後周
郡廢置黃土縣隋屬西城郡唐屬金州天寶元年更名
洵陽皇朝乾德四年省入洵陽

中下漢陰縣本漢安陽縣屬漢中郡東漢因之晉改為
安康屬魏興郡後改曰寧都南齊置安康屬西城郡唐

屬金州至德二載以安祿山姓改為漢陰縣

下石泉縣南齊曰永樂縣置晉昌郡西魏改郡曰魏昌
改縣曰石泉後周郡廢隋屬西城郡唐屬金州

下房州春秋時為麋庸二國戰國屬楚秦二漢屬漢中
郡魏置新城郡晉宋齊梁因之西魏置光遷國後周國
廢為郡隋開皇初郡廢大業初改州為房州州廢置房
陵縣唐武德元年曰遷州貞觀十年州廢自竹山徙房
州治此天寶元年曰房陵郡皇朝雍熙三年升保康軍

節度今縣三

上房陵縣秦徙趙王遷于房陵即此二漢屬漢中郡魏置新城郡以孟達為太守達叛附蜀司馬宣王討平之西魏置光遷國後周郡縣並改為光遷隋置房陵郡唐貞觀十年改縣曰房陵為房州治焉武后廢中宗為廬陵王遷之於此故永清縣本房陵縣地後魏分置大洪縣後周改焉隋屬房陵郡唐屬房州皇朝開寶中省下竹山縣故庸國嘗從周武王伐紂牧誓所謂庸蜀羌

髻二漢為上庸縣屬漢中郡魏分置上庸郡晉宋因之
後廢梁置安城縣西魏改為竹山置羅州隋開皇初改
為房州大業初州廢屬房陵郡唐武德元年置房州貞
觀十年徙治房陵故上庸縣亦漢上庸縣地梁置新豐
縣西魏改為上庸後周改曰孔陽隋開皇十八年復曰
上庸屬房陵郡唐屬房州皇朝開寶中省有白馬塞山
孟達嘗登之嘆曰此金城千里

上均州春秋時屬麋戰國屬韓二漢屬南陽漢中二郡

魏屬南鄉郡晉屬順陽郡宋置始平郡後置武當郡齊
於此僑立始平郡尋改為齊興郡梁兼置興州後周改
曰豐州隋開皇初郡廢改州為均州大業初州廢屬浙
陽郡唐武德元年置均州天寶元年曰武當郡今縣二
上武當縣二漢屬南陽郡魏屬南鄉郡晉屬順陽郡後
置武當郡隋開皇初郡廢置均州大業初州廢屬淅陽
郡唐復置均州有古塞城在縣北戰國時楚築以備秦
所據之山高峻險峭今名大塞山有武當山

上鄆鄉縣本漢錫縣地屬漢中郡魏屬魏興郡晉太康三年置鄆鄉縣宋因之隋屬淅陽郡唐屬均州有錫穴左傳文十一年楚潘崇伐麋至於錫穴是也豐川縣本漢長利縣地屬漢中郡梁置南上洛郡西魏改郡曰豐利而分錫置豐利縣後周郡廢隋以縣屬西城郡唐屬均州皇朝乾隆六年省入鄆鄉

上郢州春秋戰國皆屬楚秦屬南郡二漢屬江夏郡晉宋皆為竟陵郡梁屬南司北新二州西魏屬安州後周

置石城郡兼置郢州隋開皇初郡廢大業初州廢置竟陵郡唐武德四年曰鄧州貞觀元年州廢隸郢州十七年復置天寶元年曰富水郡今縣二

上長壽縣本漢竟陵縣地晉羊祜鎮荊州立石城因山為固惠帝元康元年分江夏西部置竟陵治此宋太始六年置長壽縣後周置石城郡隋大業初置竟陵郡唐為郢州

下京山縣晉置新陽縣梁置新州梁寧郡西魏改縣為

卷八
角陵隋開皇初郡廢大業初州廢改角陵曰京山屬安
陸郡唐武德四年置溫州貞觀十七年州廢屬郢州富
水鎮本後漢南新市縣地屬江夏郡晉因之西魏改為
富水置富人郡隋開皇初郡廢屬安陵郡唐屬溫州貞
觀十七年來屬

上唐州春秋時屬楚戰國屬韓秦屬南陽郡二漢及晉
皆因之後魏置東荊州西魏改為淮州為重鎮置兵以
備東魏隋開皇五年改為顯州州廢置淮安郡唐武德

四年曰顯州貞觀十年改為唐州天寶元年曰淮安郡
今縣五

中下泌陽縣漢湖陽舞陰平氏縣地屬南陽郡後魏置
石馬縣後語訛為上馬隋屬舂陵郡唐屬唐州貞觀元
年省入湖陽開元十五年復置天寶元年改為泌陽天
祐二年州自比陽徙治於此改為泌州後復故平氏鎮
本漢平義陽晉為西平氏屬義陽郡後置漢廣郡隋開
皇初郡廢以平氏屬淮安郡唐屬唐州皇朝開寶五年

省入泌陽有泌水在縣南即後漢光武初起兵破王莽將甄直梁丘賜死處

中下湖陽縣故蓼國二漢屬南陽郡晉省入棗陽後魏復焉置西淮安郡及南襄州後郡廢改州為南平州西魏改曰昇州後又改曰湖州後周改置昇平郡隋開皇初郡廢仁壽初改曰昇州大業初州廢以湖陽屬舂陵郡唐屬唐州棗陽故謝國詩所謂申伯番番既入于謝者也二漢為棗陽縣屬南陽郡晉屬義陽郡其後省焉

故城在今縣西北

中下北陽縣漢屬南陽郡後漢及晉皆因之後魏曰陽平置東荊州西魏改為淮州隋開皇五年又改為顯州七年改陽平縣為饒良大業初又改曰北陽置淮安郡唐屬梁州方城山自北陽相比連百里號曰方城亦曰長城馬仁陂在縣北溉田萬頃

下桐柏縣漢平氏縣地屬南陽郡梁置淮安縣及華州上川郡西魏改州為淮州後改曰純州尋廢隋開皇初

郡廢更名縣曰桐栢屬顯州後屬淮陽郡唐屬唐州禹貢桐栢山淮水所出縣因山為名

下方城縣本漢堵陽葉縣地屬南陽郡後漢及晉皆因之其後廢焉西魏置方城縣及襄邑郡隋開皇初郡廢屬滎陽郡唐屬唐州有方城山左傳所謂楚國方城以為城者也水經注云方城邑西有黃城山是長沮桀溺耦耕之所有水出黃城山東流注濩水則子路問津處同下州光化軍春秋戰國皆屬楚二漢屬南陽郡晉宋

屬順陽郡西魏置鄧城郡後周郡廢隋屬襄陽郡唐屬
襄州皇朝乾德縣本楚地陰國所遷即春秋左傳云遷
陰于下陰者也二漢為陰縣屬南陽郡西魏置鄧城郡
後周郡廢屬襄州隋曰陰城屬襄陽郡唐貞觀八年省
入穀城縣屬襄州皇朝乾德三年以陰城鎮置光化軍
及置乾德縣熙寧五年廢軍改乾德為光化縣屬襄州
後復置漢鄧縣蕭何所封屬南陽郡後漢因之晉置順
陽郡初治鄧焉西魏置鄧城郡後周廢入陰城故城在

今縣東北

輿地廣記卷八

欽定四庫全書

輿地廣記卷九

宋 歐陽忞 撰

京西北路

南輔潁昌府春秋許國戰國屬韓秦置潁川郡漢高帝
為韓國尋復故後漢因之獻帝暫都之魏晉並為潁川
郡後魏亦同西魏初得之後入東魏改曰鄭州後周曰
許州隋開皇初郡廢大業初州廢復置潁州郡唐武德

四年曰許州天寶元年曰潁川郡後升忠武軍節度梁改為匡國軍唐滅梁復曰忠武皇朝元豐三年升潁昌府崇寧四年建為南輔今縣七

次赤長社縣本都長葛邑其社中木暴長因名長社二漢及晉屬潁川郡後魏為郡治焉酈道元為郡守于南城西側修立客館土下得一木根其壯大疑是故社怪長暴茂者也隋開皇初改為潁川縣唐武德四年復為長社屬許州許田鎮本許國二漢為縣屬潁川郡獻帝

都之魏文帝改曰許昌故城在今鎮南三十里晉為郡治焉隋屬潁川郡唐屬許州後唐避諱改曰許田皇朝熙寧四年省入長社

次畿鄆城縣戰國時為魏邑史記楚昭陽伐魏收鄆是也二漢及晉屬潁川郡其後廢焉隋開皇初置鄆城縣屬潁川唐始屬蔡州長慶元年屬許州有漢召陵縣故城在東春秋齊桓公伐楚次于召陵是也後漢征羌縣故城在東南

次畿陽翟縣本夏禹之別都後為鄭櫟邑戰國韓景侯
自新鄭徙都此秦置潁川郡二漢因之晉屬河南郡東
魏置陽翟郡隋開皇初郡廢屬襄城郡唐始屬河南府
會昌三年屬許州有釣臺在南左傳所謂夏后有釣臺
之饗即此

次畿長葛縣本漢許縣地隋開皇六年分許昌置取長
葛舊名屬潁川郡唐屬許州

次畿臨潁縣漢舊縣屬潁川郡東漢至隋皆因之唐屬

許州繁城鎮本漢潁陰縣之繁陽亭魏文帝受禪于此
置繁昌縣帝既受禪自壇而降曰舜禹之事吾知之矣
壇前有二碑後其碑六字生金論者以為司馬金行故
曹氏六世遷魏西事晉晉屬襄城郡隋屬潁川郡貞觀
元年省入臨潁後唐避諱改為繁城

次畿舞陽縣漢樊噲所封二漢屬潁川郡晉屬襄城郡
後改為北舞置定陵郡隋開皇初郡廢屬潁川唐貞觀
元年屬許州尋廢開元四年復置更名舞陽有漢定陵

縣故城

中郊縣春秋時為楚邊邑令尹子瑕城郊是也漢屬潁川郡後漢省之魏復置青龍元年有龍見于郊之摩陂明帝幸陂觀龍于是改摩陂曰龍陂城曰龍城晉屬襄城郡其後廢之置龍山縣隋開皇初改曰汝南十八年改曰輔城大業初改曰郊城屬襄城郡唐屬汝州皇朝崇寧四年來屬

西輔鄭州高辛氏火正祝融之墟周武王封管叔鮮及

為虢鄆之國鄭武公與平王東遷武公滅二國而徙都
焉後鄭為韓所滅韓又徙都之秦屬三川郡二漢及魏
屬河南郡晉置滎陽郡後魏為東恒農郡東魏置廣武
郡東周置鄭州隋開皇十六年曰管州煬帝初復為鄭
州尋廢置滎陽郡唐貞觀元年州廢自武牢移鄭州治
此天寶元年曰滎陽郡皇朝景祐元年號奉寧軍節度
崇寧四年建為西輔今縣六

望管城縣故管國周武王弟叔鮮所封春秋晉師救鄭

楚子次于管以待之即此漢晉為京縣地隋開皇十六年析內年以置管城屬滎陽郡十八年改內年曰圃田省入管城唐貞觀七年自武牢移鄭州治此東有圃田為豫州藪有邲城為縣南左傳晉楚戰處

緊滎陽縣故虢國所謂東虢也二漢屬河南郡晉泰始二年置滎陽郡後魏因之北齊改曰成皋郡隋開皇初郡廢屬鄭州唐因之有鴻溝在西楚漢中分天下處漢京縣故城在東古鄉邑也莊公弟叔段居之謂之京城

太叔二漢屬河南郡晉及後魏屬滎陽郡北齊省入焉
又有索水楚漢戰京索間即此

上新鄭縣古有熊國黃帝所都也亦為高辛氏火正祝
融之墟其後世為鄆國亦作檜詩之國風所謂檜羔裘
者也鄭桓公始封在今華州之鄭其子武公與平王東
遷乃取鄆而徙居焉是為新鄭戰國時鄭滅于韓韓哀
侯自平陽徙都之二漢屬河南郡晉以後不置隋開皇
十六年復之屬滎陽郡大業初省苑陵縣入焉唐屬鄭

州有溱洧二水

卷九

中原武縣二漢屬河南郡晉以後不置隋開皇十六年復之屬滎陽郡唐鄭州漢卷縣故城在東

中滎澤縣禹貢所謂濟水溢為滎者也杜佑云今濟水不復入滎漢晉後魏為滎陽縣地隋開皇四年置廣武縣仁壽元年更名滎澤屬滎陽郡唐屬鄭州有廣武山上有東西二城中有絕澗漢高帝項羽相與臨廣武之間而語即此有敖山商王仲丁自亳遷此周宣王嘗狩

其地故詩言搏獸于敖秦于此置倉所謂敖倉也故王宮城在今縣西北左傳作王宮于踐土即此今故城內東北隅有踐土臺是也

畿密縣本鄭邑春秋諸侯伐鄭圍新密二漢屬河南郡晉屬滎陽郡唐屬河南府皇朝因之崇寧四年來屬

輔滑州古豕韋氏之國春秋時屬衛戰國時亦屬衛其西境屬魏秦屬東郡二漢因之晉為陳留濮陽二國宋武帝平河南置兗州以為邊鎮後魏置東郡隋置杞州

後為滑州又改為兗州後復為東郡唐復為滑州天寶元年更名靈昌郡大厯七年升義成軍節度後避梁王父諱改曰宣義軍後唐復故而改靈昌曰靈河皇朝太平興國四年改武成軍今縣三

中白馬縣本衛國曹邑左傳閔二年狄滅衛立戴公以廬于曹即此二漢為白馬縣屬東郡袁紹遣顏良攻東郡太守劉延於白馬關侯為曹操斬良以報焉晉屬濮陽國宋置兗州後魏置東郡隋開皇初郡廢置杞州十

六年改為滑州大業二年改為兗州後復為東郡唐又
為滑州有黎陽津一曰白馬津酈生云守白馬之津是
也有靈河津晉時石勒襲劉耀途出于此以河水泮為
神靈之助故號為靈昌津後唐改為靈河津靈河鎮漢
南燕縣地隋開皇十六年置靈昌縣以津為名屬東郡
唐屬滑州後唐改為靈河縣皇朝治平三年省入白馬
有滑臺本鄭之廩延邑其城甚固

望韋城縣故丞韋氏國商時為伯焉韋賢詩曰肅肅我

祖國自豕韋是也二漢為白馬縣地屬東郡晉屬濮陽國隋開皇六年置韋城縣屬東郡唐屬滑州

緊昨城縣故南燕國二漢為南燕縣屬東郡晉省之其後復置曰東燕隋開皇十八年改曰昨城屬東郡唐屬滑州昨城周公諸子所封左傳富辰曰凡蔣邢茅昨祭周公之嗣也杜預注東郡燕縣之南有昨亭而晉史地理志中無此郡縣豈永嘉喪亂簡編失亡故耶

望孟州春秋戰國皆屬周自漢晉至隋皆屬河內郡唐

顯慶二年割屬河南府建中二年乃以河南之河陽河
清濟源溫四縣租稅入河陽三城使又以汜水軍賦益
之會昌三年遂以此五縣為孟州今縣六

望河陽縣古孟津也周武王伐紂師度孟津即此亦曰
富平津魏尚書杜畿試船沉溺之所浮橋即晉杜預所
立自漢至隋屬河內郡唐屬河南府置河陽三城使
後置孟州今縣西南十三里有遮馬堤舊為河陰縣地
後魏爾朱榮害朝士千三百餘人於此

望溫縣本周畿內國司寇蘇忿生所封也春秋僖十年狄滅溫蘇子奔衛于是襄王以賜晉文公二漢屬河內郡晉因之其後廢焉隋開皇十六年復置屬河內郡唐武德四年屬懷州顯慶二年屬洛州後屬孟州

望濟源縣周大夫蘇忿生之原邑周襄王以賜晉文公文公伐原以示信二漢為軹縣地晉為沁水縣地俗以濟水重源所發因謂之濟源城隋開皇十六年置濟源縣屬河內郡唐武德四年屬懷州顯慶二年屬洛州徐屬

孟州漢軹縣屬河內郡後漢及晉皆因之隋大業初省入河內後復置唐貞觀元年省入濟源故城在縣東南有溴水春秋襄十六年公會諸侯于溴梁卽此

上汜水縣本東虢國鄭滅之為制邑所謂制巖邑卽此有故虎牢城周穆王獵于鄭圃獲虎命畜之因名曰虎牢二漢為城皋縣屬河南郡晉因之宋時毛德祖戍虎牢後漢晝夜攻圍二百日乃克後魏置東中府東魏置北豫州後周置滎州隋開皇初曰鄭州十八年改成皋

縣曰汜水大業初置虎牢都尉府屬滎陽郡唐屬鄭州
顯慶二年屬洛州垂拱四年曰廣武神龍元年復故後
屬孟州有汜水關皇朝大中祥符中改為行慶關東南
有成臯故關西南有旋關故關

中河陰縣漢成臯滎陽懷縣地唐開元二十九年割汜
水滎澤武陟三縣置以便運漕屬河南府領河陰倉汴
渠在縣南二百五十步即古蒺蕩渠今名通濟渠首受
黃河後屬孟州有三皇山亦曰穀鄩山山上有三城即

劉項相持處

中王屋縣古召公之邑漢垣縣獲澤地屬河東郡晉屬
河東平陽郡後魏置長平縣後周改曰王屋又置懷州
及平齊州廢置王屋郡隋開皇初郡廢屬河內郡唐武
德元年更名邵伯屬邵州貞觀元年屬懷州顯慶二年
復故名屬洛州皇朝慶厯三年來屬有禹貢王屋洸水
所出

緊蔡州春秋時屬沈蔡戰國屬楚魏秦屬潁川郡漢置

汝南郡後漢及魏晉皆因之宋及後魏兼置豫州以爲
重鎮東魏置行臺後周置總管府後改曰舒州尋復曰
豫州後改曰蔡州隋開皇初郡廢大業初州廢復置汝
南郡唐武德三年曰豫州天寶元年曰汝南郡寶應元
年改曰蔡州皇朝景祐二年升淮康軍節度今縣十

上汝陽縣漢平輿宜春安城縣地屬汝南郡後漢及晉
皆因之後魏曰上蔡置汝南郡城之西北汝水枝別左
出而北流又屈而東轉又西南會汝若垂鬣故謂之懸

瓠城宋元嘉二十七年後魏太武攻懸瓠汝南太守陳
憲拒守四十餘日不拔隋開皇初郡廢大業初復置縣
曰汝陽唐為蔡州漢有汝陽縣在西華南頓之間非今
縣也漢宜春縣屬汝南郡後漢曰北宜春晉因之後廢
焉故城在今縣西南漢平輿縣故沈國漢高帝四年置
汝南郡後漢因之晉屬汝南郡後徙焉故城在今縣東
漢安城縣屬汝南郡後漢及晉皆因之後廢焉故城縣
今縣東南

上上蔡縣故蔡國蔡叔始封地秦為上蔡縣李斯其邑人也漢屬汝南郡後漢及晉因之後魏改為臨汝北齊廢之隋開皇中置曰武津大業初復改為上蔡屬汝南郡唐屬蔡州

中新蔡縣古呂國春秋時蔡平侯自上蔡遷此故曰新蔡二漢屬汝南郡魏晉屬汝陰郡南齊置北新蔡郡後魏曰新蔡郡北齊曰廣寧郡隋開皇初郡廢十六年置廣寧縣仁壽元年改曰汝北大業初改曰新蔡屬汝南

郡唐屬蔡州漢鮦陽縣屬汝南郡後漢因之晉屬汝陰郡北齊廢之隋開皇十一年復置屬淮陽郡後廢焉故城在今縣北有葛陂

中壤信縣後漢縣屬汝南郡魏晉屬汝陰郡宋改曰包信隋大業初復故名屬汝南郡唐屬蔡州西南有白亭楚王孫勝為白公即此處

中平輿縣漢舊縣後廢隋大業初改新蔡為平輿屬汝南郡唐屬蔡州有葛陂水經云億水左迤為葛陂方數

十里水物含靈多所包育後漢費長房投竹化成龍處
中遂平縣故房子國國語所謂周昭王娶于房曰房后
是也楚靈王遷房于楚而有其地後以封吳王之弟夫
槩為堂谿氏故曰吳房漢屬汝南郡後漢及晉皆因之
後曰遂寧隋大業初改曰吳房屬汝南郡唐屬蔡州元
和十二年平吳元濟更名遂平

中新息縣故息國二漢屬汝南郡晉為郡治焉後魏置
東豫州梁曰西豫州又改曰淮州東魏復曰東豫州後

周曰息州隋大業初州廢屬汝南郡唐屬蔡州漢安陽縣故江國也漢及晉皆屬汝南郡後廢焉故城在今縣西

中確山縣本漢安昌縣屬汝南郡後漢省之其後復置郡隋開皇十八年改為朗山屬汝南郡唐屬蔡州皇朝大中祥符五年改為確山漢朗陵縣屬汝南郡後漢及晉皆因之後廢焉故城今在縣西南有道城故道國左傳曰江黃道栢皆弦姻也在漢為陽安縣後漢及晉皆

因之後廢焉

中真陽縣本漢慎陽縣屬汝南郡慎字本作渙音真永平五年失印更刻遂誤以水為心也後漢及晉皆因之後魏置郢州東魏廢州置義陽郡北齊廢郡入保城縣隋開皇十一年廢保城十六年置真丘縣大業初改曰真陽屬汝南郡唐屬蔡州漢新陽縣屬汝南郡後漢因之晉省焉故城在今縣西南

中西平縣故栢子國漢舊縣屬汝南郡後漢及晉皆因

之後魏置襄城郡北齊改曰文城郡隋開皇初郡廢屬
汝南郡唐屬蔡州

上陳州包犧氏都曰太昊之墟周封舜後妫滿于此以
備三恪為陳國楚滅為縣楚頃襄王自郢徙都此兼為
魏境秦屬潁川郡二漢屬淮陽國汝南郡後漢因之晉
屬梁國汝南郡後魏置陳郡及北揚州北齊改為信州
隋為陳州後置淮陽郡唐為陳州晉開運二年置鎮安
軍節度漢初軍廢周廣順二年復之今縣五

緊宛丘縣周時陳都楚頃襄王滅之自郢徙都焉陳勝
反秦據陳自立為張楚漢高帝置淮陽國章和二年改
為陳國晉併入梁國後魏曰項置陳郡隋開皇初改縣
曰宛丘而郡廢焉大業初為淮陽郡唐為陳州爾雅曰
丘上有丘曰宛丘今其地形則然有固陵城項羽南走
固陵即此

上項城縣本項國戰國屬楚項羽家世楚將封于項故
姓項氏二漢屬汝南郡皆屬梁國後魏置揚州及秣陵

縣梁改曰殷州東魏改曰北平州後齊改曰信州後周
改曰陳州隋開皇初改秣陵為項城縣大業初州廢屬
淮陽郡屬陳州

中商水縣本漢汝陽縣地屬汝南郡後漢及晉皆因之
後魏置汝陽郡北齊郡廢隋開皇十六年置潁水縣大
業初省汝陽入焉屬淮陽郡唐屬陳州皇朝建隆元年
改為商水漢地理志汝南有潁疆縣水經注云潁水出
潁川陽城縣少室山東經潁疆縣故城東又南逕西華

縣故城南又東逕汝陽故城北東注于潁

中南頓縣故頓子國應劭曰頓迫于陳其後南徙故曰南頓二漢及晉汝南郡後魏置南頓郡北齊郡廢隋開皇六年改縣曰和成大業初復改曰南頓屬淮陽郡唐屬陳州皇朝熙寧六年省入商水元祐元年置

中西華縣二漢屬汝南郡晉省之後置長平縣隋開皇十八年改曰鴻溝大業初復改曰西華屬淮陽郡唐武德元年更名箕城屬陳州景雲元年復故名長華鎮漢

為長平縣屬汝南郡後漢屬陳國北齊省入國晉屬梁
西華

上潁州春秋時為胡國及楚地秦為潁川郡地二漢屬
汝南郡魏置汝陰郡晉因之後魏置潁川郡隋亦為潁
川復為汝陰郡唐為潁州皇朝元豐二年升順昌軍節
度今縣四

望汝陰縣西北有胡城故胡國二漢為汝陰縣屬汝南
郡魏置汝陰郡後廢晉泰始二年復置隋開皇初郡廢

大業初復置唐為潁州二漢細陽郡屬汝南郡晉省之
故城在今縣西北

緊萬壽縣蓋二漢細陽縣地皇朝開寶六年析汝陰之
百尺鎮置萬壽縣屬潁州水經注云百尺水承次塘細
陂南疏注于潁鎮實因水為名

緊潁上縣本楚慎縣地二漢屬汝南郡晉屬汝陰郡後
廢焉梁置下蔡郡北齊郡廢隋大業初置潁上縣于故
鄭城屬汝陰郡唐武德四年移于今治屬潁州慎縣故

城在今縣西北

緊沈丘縣本漢項縣地屬汝南郡後置沈丘縣隋開皇十六年置沈州領沈丘宛丘二縣唐初州廢以宛丘屬陳州沈丘屬潁州後省沈丘入汝陰神龍二年復置有武丘聚曰丘頭魏王陵鎮壽春欲興兵討司馬宣王宣王自往征之軍至丘頭陵懼面縛水次故號為武丘即此

輔汝州東周為王畿春秋為戎蠻子邑及屬楚鄭戰國

屬韓秦屬三川郡二漢屬河南潁川郡魏晉屬河南襄城郡後魏屬汝北魯陽郡東魏置北荊州後周改曰和州隋初置伊州煬帝初改為汝州後廢州以其地屬襄城潁川二郡唐為汝州天寶元年曰臨汝郡今縣五

中梁縣本漢周承休邑武帝元鼎四年行幸至洛陽詔封姬嘉為周子南君以奉周祀初元五年以周子南君為周承休侯邑屬潁川郡後魏曰汝源縣置汝北郡後改曰汝陰郡後周郡廢隋大業初改汝源為承休置襄

城郡唐為汝州貞觀元年改承休為梁縣梁本周南鄭之邑在承休西南四十二里有霍陽聚左傳哀四年楚人為晉之期襲梁及霍是也戰國曰南梁以別大梁少梁焉漢屬河南郡後漢及晉皆因之隋屬襄城郡唐屬承州貞觀元年省梁入承休而更名承休曰梁西有澤後漢作苑為遊獵之地鄧太后臨朝世士以為文教可興宜廢蒐狩之禮于是馬融作頌以諷焉後桓帝復校獵廣成今日廣潤河蓋避朱梁廟諱也有羆狐聚秦滅

西周徙其君于此有陽人聚秦滅東周徙其君於此臨汝鎮唐先天元年置縣屬汝州貞元八年以梁縣西界二鄉益之兼移縣于石驛後入梁

緊襄城縣本鄭地南有汜城周襄王避叔帶之難出適鄭處于汜是也以襄王所居因曰襄城楚靈王築又有古不羹城在西北二漢屬潁川郡晉置襄城郡隋開皇初初郡廢屬汝州大業初州廢屬潁川郡唐武德元年置汝州貞觀元年州廢屬許州開元二十六年來屬

上葉縣本楚地惠王以封沈諸梁謂之葉公葉公好龍
神龍下焉二漢屬南陽郡明帝時王喬為葉令每月望常
乘雙鳧入朝今有墓在焉晉屬南陽國北齊置襄州後
周廢州置南襄城郡隋開皇初郡廢屬許州唐開元三
年置仙州二十六年州廢大厯四年復置仙州又析置
仙鳧縣五年州廢省仙鳧入葉來屬二漢父城縣屬潁
川郡晉屬襄城郡後廢入葉有應鄉故應國按汲冢古
文商時王有應國矣周武王以封其子為應侯故左傳

邾晉應韓武之穆也戰國為秦所有以封范雎為應侯
有方城左傳所謂楚國方城以為城即此又有昆陽城
即光武破王尋之所也

中魯山縣在夏為魯縣陶唐氏既衰其後有劉累為御
龍氏以事夏孔甲龍一雌死潛醢以食夏后既而使求
之懼而避于魯縣是也漢為魯陽屬南陽郡後漢及晉
皆因之後魏置荊州尋廢立魯陽郡後置魯州隋開皇
初郡廢大業初州廢以魯縣屬襄城郡唐為魯山武德

四年復置魯州貞觀九年州廢以魯山來屬故犂縣本鄭邑漢屬南陽郡後廢故城在今縣東南後周置三鵠鎮在縣西南十九里又置平高城以備齊北齊置魯城在縣東北十七里以御周

中龍興縣本湍陽縣唐武德四年置屬伊州貞觀元年省證聖七年復置曰武興屬汝州神龍元年更名為中興尋改曰龍興皇朝熙寧四年省入魯元祐元年復置同下州信陽軍春秋時屬申其後屬楚秦屬南陽郡二

漢屬南陽江夏郡晉置義陽郡宋置宋安郡南齊置司
州梁因之有三關之隘北接陳汝控帶許洛宋以來省
為邊鎮後魏改曰郢州後周改曰申州隋開皇初郡廢
大業二年改曰義州尋為義陽郡唐為申州天寶元年
曰義陽郡皇朝開寶九年降為義陽軍太平興國元年
改為信陽今縣二

中下信陽縣二漢平氏縣地屬南陽郡晉分置義陽縣
屬義陽郡後廢焉宋曰平陽縣置宋安郡隋開皇初郡

廢改平陽縣為義陽大業初置義陽郡唐為申州皇朝
為義陽軍太平興國元年改義陽縣為信陽漢鐘武縣
屬江夏郡後漢省焉故城在今縣東南漢郢縣屬江夏
郡後漢及晉因之北齊改為齊安置齊安郡隋開皇初
郡廢改縣曰鐘山屬義陽郡唐屬申州皇朝開寶九年
省入義陽有鐘山桐栢山淮水

中下羅山縣二漢郢縣地北齊置高安縣隋開皇初廢
十六年復置曰羅山屬義陽郡唐屬申州皇朝屬信陽

軍有石城山甚高峻史記曰魏攻冥阮蓋謂此山也呂氏春秋言九塞冥阮其一焉



輿地廣記卷九